



目 780
895

部-21-2

光緒庚子八月

武經通書錄

呂廬王同署



嘉惠堂刊行

海鹽馬氏玉堂論書目絕句若干首中有歷代編年
藏書紀要云編年作史古來有書目編年昔所無更
羨蘭陵傳入則指南後學識迷途然紀要未之見也
郡縣志經籍一門乃載各家所撰之書非各家所藏
之目昔鄭芷畦元慶手訂湖錄中載自五代以迄明
季藏書者三十家竝采錄事實附綴於後范聲山錯
校定爲吳興藏書錄一卷而武林爲浙中首郡天水
行都聲名文物甲於寰宇士多好學家尙蓄書流風
遺韻扇逸留芬歷歲旣深或遭兵火或替雲祲旣毀
縹緲并亡簿錄無緣覆瓿遑論借祇乎申幼耽竹素

長閱桑滄既抱

文瀾之殘帙更補書庫之闕編遺馥則卷守八千末
學則畧窺萬一採公私目錄備古今掌故挂漏知不
能免留覽聊以自娛

光緒乙酉七夕暴書日竹舟丁申識

題辭

德清俞樾

武林山水甲神州文物東南莫與儔
緗帙縹囊富藏弄香梨文梓競雕鏤
丁君好古承遺緒上溯六朝范與褚

吳范平晉褚陶

遙遙書藏訪錢家

宋錢

下逮瓶花兼玉

雨

吳焯瓶花齋韓文綺玉雨堂皆藏書家也

我披此錄心忡忡千秋過眼

如飛蓬自歎衰年逢厄運因將盛事話乾隆乾隆一

代空千古文治武功無與伍大小金川盡削平更命

遺書蒐四部同時四閣建崢嶸淵湖源津各錫名舊

典已教稽永樂新書更爲訪寰瀛收藏最富惟江浙

特下璽書問存佚浙中首及曝書亭次及甯波范天

一猶恐叢殘未盡蒐山厓屋壁徧搜求亂危傾覆詔

無忌諭云卽有忌帝虎烏焉官與讐山塘書賈推金

氏古籍源流能僕指吾湖書客各乘舟一棹煙波販

圖史不知何路達 宸聰都在 朝廷清問中見乾隆三

十八年閏三月初七日上諭星火文書下疆吏江湖物色到書傭

窮陬僻壤開風氣何況之江名勝地遂使汪吳范鮑

孫汪啟淑汪汝璉吳玉墀各將私藏呈中祕大開書

局太平坊編次諸君日夜忙時於太平坊一十四回

分奏 御四千餘種各提綱浙撫進書十四次共原

籍發還歸世守玉堂巨印鈐如斗各書著錄發還者鈐蓋翰林院印

頌來圖籍共幾家浙江蒙 賜圖書集成者三家鮑

亦三家吳孫及汪汝璉也 奉到 御題凡幾首進書稱 旨者皆

西湖建閣號文瀾百有餘年未改觀偶爾黃埃興黑

霧依然綠水映紅欄茫茫天道真難計時局日新還

月異爭從西學拜西師各習洋文譯洋字回憶篁庵

設局年同治六年巡撫馬端敏公奏設書局於篁庵

中興氣象故依然戴園風景無更改人事煙雲有變

遷北望神京堪痛哭古來淪陷無斯速劉井柯亭化

作灰遑論牙籤兼玉軸似聞太學幸猶存石鼓遺文

尚可捫留得幾家書肆在廠東門到廠西門有客書
來慰遲暮門下士章一山明經升平未必難重覩異日蒲輪下
漢廷誰爲伏勝誰轅固八十衰翁鬢似絲河清可待
恐無時惟援小雅詩人例思古傷今自賦詩

武林藏書錄卷首

賞加四品頂戴候選主事臣丁申恭錄

文瀾閣

乾隆四十七年七月初八日奉

諭四庫全書現在頭分已經告竣其二三四分限於
六年內按期蒞事並特建文淵文溯文源文津四閣
以供藏庋因思江浙爲人文淵藪允宜廣布以光文
治現特發內帑銀兩僱覓書手再行繕寫三分分貯
揚州大觀堂之文匯閣鎮江金山寺之文宗閣杭州
聖因寺內今擬改建文瀾一閣以昭美備著傳諭陳

輝祖伊齡阿盛住等所有大觀堂金山寺二處貯藏
圖書集成處所其所餘空格甚多即可收藏貯四庫
書若書格不敷著伊齡阿再行添補至杭州聖因寺
後之玉蘭堂著交陳輝祖盛住改建文瀾閣并安設
書格備用伊齡阿盛住於文淵閣書格式樣皆所
素悉自能仿照妥辦至修建格式等項工費無多即
著兩淮浙江商人捐辦伊等情殷桑梓於此等嘉惠
藝林之事自必踴躍觀成歡欣從事也

御製詩云四庫鈔書成次第因之絜矩到南邦班傭
此實官帑發虛徑彼殊眾力扛袞鉞必公慎取舍濬

澠細辨斥蒙厖范家天一於斯近幸也文瀾乃得雙
按兩浙鹽法志

高宗純皇帝命儒臣編輯四庫全書建 文淵 文

溯 文源 文津四閣藏皮羣籍復念江浙爲人文

淵藪宜廣布以光文治

命再繕三分

賜江南者二浙江者一浙江卽以舊藏圖書集成之

藏經閣改建 文瀾閣并仿 文淵閣藏貯閣在孤

山之陽左爲白隄右爲西泠橋地勢高敞攬西湖全

勝外爲垂花門門內爲大廳廳後爲大池池中一峰

獨聳名仙人峯東爲

御碑亭西爲遊廊中爲

文瀾閣閣建三成第一成

中藏圖書集成後及兩旁藏經部第二成藏史部第三成藏子集二部皆分皮書格凡四庫書三萬五千九百九十冊爲匣六千一百九十一圖書集成五千二十冊爲匣五百七十六總目考證二百二十七冊爲匣四十委員掌之有願讀中祕書者許其借觀傳寫設檔登註勿令遺失污損所以嘉惠藝林者至矣夫前代書籍多藏祕府牙籤錦帙外人莫得而窺聞有頒賜給借已屬僅事如我朝之以四庫縹緗津

逮末學

鄉嬛福地徧及東南誠曠古所未有也又

光緒杭府志

文瀾閣咸豐庚申間毀於兵光緒六

年巡撫譚鍾麟布政司德馨飭郡人鄒在寅卽舊址建閣臨湖豎坊并建

御碑亭及太乙分青室堅固宏敞氣象一新七年

奏請匾額十月十六日奉

諭譚鍾麟奏修復文瀾閣請頒發匾額方略並將按求遺書之紳士獎勵等語浙江省城文瀾閣毀於兵燹現經譚鍾麟籌款修復其散佚書籍經紳士丁申丁丙購求藏弄漸復舊觀洵足嘉惠藝林著南書房

翰林書寫文瀾閣匾額頒發並著武英殿頒發勦平
粵匪方略一部交浙江巡撫祇領尊藏主事丁申著
賞四品頂戴以示獎勵

天語煌煌

皇恩疊錫誠東南文運之轉機浙省藝林之盛事安
知文宗文匯兩閣不以此爲權輿而次第興舉
歟

武林藏書錄卷上

北宋杭州學書版

錢塘丁申撰

乾道臨安志府學舊在府治之南子城通越門外元
祐閒知杭州熊本蘇軾乞賜書版按文忠公奏狀云
伏見本州州學見管生員二百餘人及入學參假之
流日益不已蓋見朝廷尊用儒術更定貢舉條法漸
復祖宗之舊人人慕義學者日眾若學糧不繼使至
者無歸稍稍引去甚非朝廷樂育之意前知州熊本
曾奏乞用廢罷市易務書版賜與州學印賃收錢以

助學糧或乞賣與州學限十年還錢今蒙指揮只限五年見今轉運司差官重行估價約一千三百餘貫若依限送納卽州學歲納二百六十貫五年之閒深爲不易學者旦夕闕食而望利於五年之後何補於事而朝廷歲得二百六十貫如江海之中增損涓滴了無所覺徒使一方士民以爲朝廷旣已捐利與民廢罷市易務所放欠負動以百萬計農商小民尙蒙聖澤莫知紀極而獨於此飢寒儒素之士惜毫末之費猶欲以此追收市易之息流傳四方爲損不少此乃有司出納之吝而非朝廷寬大之政也臣以侍從

備位守臣懷有所見不敢不盡伏望聖慈特出宸斷盡以市易書版賜與州學更不估價收錢所貴稍服士心以全國體謹錄奏聞伏候敕旨貼黃臣勘會市易務元造書版用錢一千九百五十一貫四百六十九文自今日已前所收淨利已計一千八百九十九貫九百五十七文今若賜與州學除已收淨利外只是實破官本六十一貫五百一十二文伏望詳酌施行今惟新唐書尙有傳本餘則著錄家罕有言及者究不知當日刻書有若干種也

朝野雜記中興館閣書目者孝宗淳熙中所修也高宗始渡江書籍散佚紹興初有言賀方回子孫鬻其故書於道者上命有司悉市之時蕪湖縣僧有蔡京所寄書籍因取之以實三館劉季高爲宰相掾又請以重賞訪求之五年二月尙書兵部侍郎王居正言四庫書籍多闕乞下諸州縣將已刊到書版不論經史子集小說異書各印三帙赴本省係民間者官給紙墨工賃之直從之九月大理評事諸葛行仁獻書萬卷於朝詔官一子十三年初建祕閣又命紹興府借陸賓家書繕藏之十五年遂以秦熺提舉祕書省

掌求遺書至是數十年所藏益充初及命館職爲書目其綱例皆倣崇文總目凡七十卷陳騏領其事淳熙十三年九月祕書郎莫叔光上言今承平滋久四方之人益以典籍爲重凡搢紳家世所藏善本外之監司郡守搜訪得之往往鋟版以爲官書然所在各自版行與祕府初不相關則未必其書非祕府之所遺者也乞詔諸路監司郡守各以本路本郡書目解發至祕書省聽本省以中興館書目點對如見得有未收之書卽移文本處取索印本庶廣祕府之儲以增文治之盛有旨令祕書省將未收書籍徑自關取

今中興館閣書目十卷乃淳熙四年陳騏撰李燾序
續錄十卷嘉定三年館閣重編其後次第補錄迄於
咸淳然今所傳者非完書也按直齋書錄解題有祕
書省闕書目一卷亦紹興改定其闕者注闕字於逐
書之下今所傳鈔者凡二卷計書三千八百餘種道
光壬辰大興徐松從永樂大典錄出編爲一目爲傳
鈔本大略相同蔣光煦題四庫闕書目云闕編改定
紹興初祕省香芸飽蠹魚不是紀聞留玉海定知七
卷記求書玉海四庫求書考館閣錄祕書省石渠在
祕閣後道山堂前東廊圖書庫祕閣書庫經庫西廊

祕閣書庫印版書庫編修會要所北爲印書作祕閣
書庫儲藏諸州印版書六千九十八卷一千七百二
十一冊又咸淳臨安志祕書省書庫日厯會要庫各
一經史子集書籍庫六分列於右文殿外東西兩廡
又有書版庫在著庭之右據此可見南宋百五十年
典籍之大略矣

太學書版庫

宋太學在前洋街按咸淳臨安志紹興十三年臨安
守臣王喚請卽錢塘縣西岳飛宅造國子監從之監
繪魯國圖東西爲丞簿位後爲書庫官位中爲堂書

版庫在中門之內紹興九年臣僚請下諸道郡學取舊監本書籍鏤版頒行從之然所取多殘闕二十一年旨諭輔臣曰監中闕書令次第鏤版雖重有所費不惜也絲是經籍復全按朝野雜記紹興初張彥實請刊監本王瞻叔請摹印經書置學宋時刻本以杭州爲上蜀本次之福建爲下而杭州所刻尤以監本爲勝如十三經注疏史記漢書等皆標題監本以別之元大德中九路刊十七史太平路以西漢書率先俾諸路取式致工於武林明南監取各路經史舊版重加修整逮萬厯間二監重刊經史皆有以導之先

聲者也

南宋諸刻

天水建都以來杭州文事日盛太學旣刻經史諸書以廣流傳而外之公府私家亦有足紀者謹按

天祿琳瑯羣經音辨爲臨安府學所刊有臨安府學教授等銜名漢官儀爲臨安府所刊末有紹興九年三月臨安府雕印字又田裕齋書目陶叔獻西漢文類末有紹興十年四月臨安府雕印一行姚鉉唐文粹後有臨安府今重行開雕唐文粹乙部計貳拾冊已委官校正訖紹興九年正月日一條下列校刊銜

名十一行又絳雲樓書目周守忠姬侍類偶嘉定十三年臨安行在諸軍糧料院幹辦鄭域所刻餘若夢梁錄載杭城市肆淳祐年有名相傳者太廟前尹家文字鋪所刻北戶錄見於

天祿琳琅彩畫三輔黃圖見於周密煙雲過眼錄續幽怪錄見於黃丕烈士禮居藏書記又有張官人諸史子文籍鋪又

天祿琳琅載容齋三筆後記臨安府鞞鼓橋南河西岸陳氏書籍印考杭州府志鞞鼓橋屬仁和縣境今橋名尙沿其舊與洪福橋馬家橋相次在杭州府城

內西北隅當時書肆陳氏多有著名思在大街起在睦親坊皆非鞞鼓橋之書鋪也士禮居藏書記又載寒山拾得詩後有一條杭州錢塘門內車橋南大街郭宅書鋪印行至田裕齋書目所載之漢紀三十卷爲紹興閒錢塘刻本則不可考其爲何處矣

西湖書院

西湖書院元改宋太學爲之內有書庫藏皮書版泰定元年九月山長陳表重整書日記曰文者貫道之器爰自竹簡更爲梓刻文始極盛而道益彰西湖精舍因故宋國監爲之凡經史子集無慮二十餘萬皆

在焉其成也豈易易哉近歲鼎新棟宇工役愆遽東
遷西移書版散失甚則置諸雨淋日炙中駸駸漫滅
一日憲幕長張公昕同寅趙公植柴公茂因奠謁次
顧而惜之謂興滯補弊吾黨事也適度地於尊經閣
後創屋五楹爲庋藏之所俾權山長黃裳教導胡師
安司書王通督飭生作頭顧文貴等始自至治癸亥
夏迄於泰定甲子春以書目編類揆議補其闕噫昔
人勤於經始張公長貳善於繼述此志良可嘉也是
用紀其實績彙覓存書目勒諸堅珉以傳不朽非獨
爲來者勸抑亦斯文之幸也歟重整書目碑經凡五

十一種易古注易注疏易程氏傳書古注易復齋說
書注疏詩古注詩注疏穀梁古注穀梁注疏埤雅論
語古注論語注疏論語講義儀禮古注儀禮經傳春
秋左傳注春秋左傳疏公羊古注公羊注疏孝經注
疏孝經古注古文孝經注語孟集注孟千古注孟子
注疏文公四書大學衍義國語注

補音

春秋高氏傳

禮記古注禮記注疏周禮古注周禮注疏儀禮注疏
儀禮集說陸氏禮象葬祭會要政和五禮文公家禮
經典釋文羣經音辨爾雅古注爾雅注疏說文解字
玉篇廣韻禮部韻略毛氏增韻博古圖孔氏增韻雅

文公小學書史凡三十六種大字史記中字史記史
記正義東漢書西漢書三國志南齊書北齊書宋書
陳書梁書周書後魏書元輔表刑統注疏刑統申明
刑律文成憲綱要新唐書五代史 并纂誤 荀氏前漢
記袁氏後漢記通鑑外紀通歷資治通鑑武侯傳通
鑑綱目仁皇訓典唐書直筆子由古史唐六典救荒
活民書臨安志崇文總目四庫闕書唐書音訓子凡
十一顏子曾子荀子列子揚子文中子太元溫公注
太元集注武經七書百將傳新序集凡二十四通典
兩漢蒙求韻類題選回文類聚聲律關鍵西湖紀逸

農桑輯要韓昌黎文集蘇東坡集唐詩鼓吹張南軒
文集曹文貞公集武功集金陀粹編擊壤詩集林和
靖詩呂忠穆公集王魏公集伐檀集王校理集張西
巖集晦庵大全集宋文鑑六臣文選注又至正二十
二年八月臨海陳基書目序曰杭西湖書院宋季太
學故址也宋渡江時典章文物悉襲汴京之舊既已
衰輯經史百氏爲庫聚之於學又設官掌之今書庫
版帙是也德祐內附學廢今爲肅政廉訪司治所至
正二十八年故翰林學士承旨東平徐公持浙西行
部使者節卽治所西偏爲書院祀先聖宣師及唐白

西林藏書錄
居易宋蘇軾林逋三賢後爲講堂設東西序爲齋以處師弟子員又後爲尊經閣閣之北爲書庫收拾宋學舊籍設司書者掌之宋御書石經孔門七十二子畫像石刻咸在焉書院有義田歲入其租以供二丁祭享及書刻之用事達中書匾以今額且署山長司存與他學官埒於是西湖之有書院書院之有書庫實昉自徐公此其大較也由至元迄今嗣持部使者節於此者春秋朔望踵徐公故事行之未之或改也獨書庫屋圯版缺或有所未備杭之有志者聞以私力補葺之而事不克繼至正十七年九月開尊經閣

壞圯書庫亦傾今江浙行中書平章政事兼同知行樞密院事吳陵張公曾力而新之顧書版散失埋沒所得瓦礫中者往往剝毀蠹朽至正二十一年公復釐補之俾左右司員外郎陳基錢用董其役庀工於是年十月一日所重刻經史子集欠缺以版計者七千八百九十有三以字計者三百四十三萬六千三百五十有二所繕補各書損毀漫滅以版計者一千六百七十有一以字計者二十萬一千一百六十有二用粟以石計者一千三百有奇木以株計者九百三十書手刊工以人計者九十有二對讀校正則餘

姚州判官宇文桂山長沈裕廣德路學正馬盛紹興
路蘭亭書院山長凌雲翰布衣張庸齋長宋良陳景
賢也明年七月二十三日工竣飭司書秋德桂杭府
史周羽以次類編藏之經閣書庫秩如也先是庫屋
洎書架皆朽壞至有取而爲薪者今悉修完工既畢
俾爲書目且序其首并刻石庫中夫經史所載皆歷
古聖賢建中立極修己治人之道後之爲天下國家
者必於是取法焉傳曰文武之道布在方策不可誣
也下至百家諸子之書必有裨世教者然後與聖經
賢傳並存不朽秦漢而降迄唐至於五季上下千數

百年治道有得失享國有久促君子皆以爲書籍之
存亡豈欺也哉宋三百年來大儒彬彬輩出務因先
王舊章推而明之其道大著中更靖康之變凡百王
詩書禮樂相沿以爲軌則者隨宋播越流落東南國
初收拾散佚僅存十一於千百斯文之緒不絕如綫
西湖書院版庫乃其一也承平日久士大夫家誦而
人習之非一日矣海內兵興四方驛騷天下簡冊所
在或存或亡蓋未可考也杭以崎嶇百戰之餘而宋
學舊版賴公以不亡基等不敏亦辱與執事者手訂
而目校之惟謹可謂幸矣嗟夫徐公整輯於北南甯

武林藏書錄卷上
謚之時今公繕完於兵戈搶攘之際天之未喪斯文也或尙在茲乎序而傳之以告來者不敢讓也按元黃文獻潛西湖書院義田記西湖書院實宋之太學規制尤甚舊所刻經史羣書有專官以掌之號書庫官宋亡學廢而版庫具在至元二十八年承旨徐文貞公治杭以其建置之詳達於中書俾書院額立山長書庫之所掌悉隸焉郡人朱慶宗捐宜興州田二百七十五畝歸於書院別儲以待書庫之用此整書記書日序所未及也元時杭州刻本承宋之遺爲諸路冠故宋遼金三史奉旨刻於杭州路蘇天爵元文

類至正二年奉旨發西湖刊行足徵刻工之精矣觀目中所列皆有傳本閒有一二如西湖紀逸張西巖集近世罕覩當時所刻想無題識如睦親棚北等字藏書家亦莫能道之者考元史至元十五年三月遣使至杭州取在官書籍版刻至京師目中所載凡一百二十二種或爲當時所遺又相傳宋刊書版入元皆輦而之北惟存臨安一志更不足信惟田裕齋書目載馬端臨文獻通考初刻於泰定元年寘版西湖書院至正五年江浙儒學提舉余謙重爲訂正補刊是書與碑刻於同時未及列入惜至正二十一年之

書目不傳無從考證耳

尊經閣

杭州府學在宋爲京學紹興初以慧安寺故基改建
嘉定九年教授袁肅黃灝拓而大之迨紹定潛祐開
疊加修葺元至正間一燬於寇再燬於火康里帖木
烈思夏思忠兩次修葺明洪武七年杭州府知府王
德宣奉詔重建德宣捐俸置書凡三十一部若史記
前漢書後漢書三國志晉書宋書南齊書梁書陳書
魏書北齊書周書隋書唐書五代史通鑑綱目通鑑
外紀文獻通考杜氏通典古史臨安志高氏春秋許

氏說文劉向新序文公家禮孝經正義丙丁龜鑑平
宋錄息心銓要西湖紀遺救荒活民書永樂閒朝廷
賜書凡一十七部若御製大誥三編孝順事實爲善
陰騭性理大全四書大全詩傳大全周易大全書傳
大全春秋大全禮記大全書傳會選孟子節文五倫
書古今列女傳仁孝皇后勸善書大明律諸司職掌
見於成化杭府志者可得而考焉迨正德十二年知
府留志淑遷仁和縣學石經於戟門外道統十三贊
於尊經閣下大學士丹徒楊一清爲記提學副使劉
瑞悼學無藏書請以刑金購求諸書藏尊經閣命訓

導專領之又刻聖經於明倫堂屏上而學之規模大
備瑞自爲記曰杭會郡也華侈甲天下而學無藏書
頒於廷者惟經惟四書惟性理惟孝□□□□□□
□□五倫官所置僅漢宋諸史瑞董學又明年請於
按浙監察御史宋公慨然曰吾方石經是葺斯舉也
盍並圖之夫有書而不讀君子病焉况無書乎於是
出刑金貯於府者遣訓導林鳳鳴劉銛往求焉越四
月書至約計萬卷經史子集秩然略備櫝藏於閣命
一訓導專領之師生誦觀籍其出納惟謹其名數備
之石皆公命也既成瑞進師生告之曰子知監察公

之厚爾庠校者至且遠乎古之君子道足以表世則
物而功化之盛極於康海宇涵蠢動參天兩地莫之
尙也未有不學而成者吾夫子設教故曰博約曰多
聞見曰前言往行畜其德從可知矣季路謂何必讀
書直以佞斥之於戲讀書者學之始終也讀天下之
書斯可與論天下之事矣此監察公藏書之意也公
嗣名卿家學持憲侃侃博聞好古藻翰瓌瑋非世俗
吏可能故舉措屢於風教若是爾師生其遇哉有言
者曰求道者五經四書足矣奚以多爲多言者道之
害也嗟乎此非知道者信斯言也淫哇鄭衛詩所宜

刪宋萬許止春秋所宜削吾夫子不然豈獨默無意也故曰道無往而不存言非眇而可略夫經者天也史者四時五行也諸子集者萬彙也天者道之原也宰物而不宰於物者也四時五行經緯於天而不容已者也乃若萬彙斯微矣飛者躍者織者鉅者蠢而動者各聲聲色色於覆幬雖或反戾恣睢以逞天亦莫之絕也其諸子集之謂乎簡之裁之神而明之存乎其人耳故曰爲天地立心持是心以讀天下之書無難矣讀書之要子朱子告其君者具在爾師生其從事焉知府留侯志淑以記請書之使後之求公者

有考也碑陰詳列書目易經大全一部計一十二冊
書經大全一部計五冊詩經大全一部計四冊禮記
大全一部計一十八冊春秋大全一部計一十六冊
四書大全一部計二十冊孔子家語計一冊儀禮經
傳通解一部計五十冊大戴禮記計一冊禮書一部
計一十冊樂書一部計一十冊十三經注疏二部共
計一百六十冊性理大全一部計二十九冊朱子大
全二部共計八十冊朱子三書一部計二冊史記二
部共計四十冊前漢書二部共計四十冊後漢書
一部計二十四冊晉書一部計二十九冊南史二部

共計三十二冊北史二部共計四十八冊魏書二部
共計六十冊宋書二部共計六十冊梁書二部共計
二十冊陳書二部共計一十二冊南齊書二部共計
二十三冊北齊書二部共計三十六冊後周書一部
計一十冊隋書二部共計三十八冊唐書二部共計
九十冊五代史二部共計一十六冊宋史一部計七
十冊元史二部共計八十冊通鑑前編三部共計二
十四冊通鑑綱目二部共計六十八冊三國志一部
計一十冊十七史二部共計五十九冊少微通鑑二
部共計一十二冊通志略一部計一百二十冊國語

一部計四冊戰國策二部共計九冊程史一部計二
冊世史正綱二部共計二十冊宋元鑑二部共計一
十二冊六子全書一部計一十四冊呂氏春秋一部
計四冊王充論衡一部計六冊韓柳文一部計八冊
六書統一部計一十四冊書學正韻一部計一十六
冊太玄本旨一部計二冊文獻通考一部計六十冊
玉海一部計十八冊集事淵海一部計三十二冊事
文類聚一部計三十七冊韻府羣玉一部計一十冊
翰林全書一部計二十冊事林廣記一部計三冊埤
雅一部計二冊讀書記一部計三十冊宋文鑑一部

計二十冊文章正宗附續一部計一十八冊東萊博
議一部計二冊大學衍義補二部共計五十二冊地
理大全計一十一冊玉機微義一部計六冊名臣奏
議一部計三十冊陸宣公奏議一部計四冊漢雋一
部計三冊李忠定公奏議一部計一十冊于少保奏
議二部共計一十二冊王魯齋研幾圖計一冊古今
識鑒計一冊錦繡策計一冊止齋論祖計一冊脈訣
俗解計一冊類博藁一部計二冊三蘇文集一部計
六冊朱文公召寓錄口渭南文集一部計一十冊葉
水心文集一部計六冊梅溪文集一部計一十冊止

齋文集一部計六冊誠意伯文集一部計一十冊蘇
平仲文集一部計四冊木鐘集一部計四冊鹿城書
院集計一冊儒志編計一冊遜志齋集一部計一十
冊楊文懿公文集一部計四冊楊文懿公敷奏集一
部計四冊魏文靖公文集一部計四冊姚文敏公文
集一部計三冊鄭氏麟溪集一部計四冊鄭氏旌義
編計一冊忠簡公文集計一冊疑辨錄一部計三冊
竹齋集一部計二冊釣臺集一部計二冊嚴陵八景
詩計一冊洪武正韻一部計五冊皇明政要一部計
三冊孝順事實一部計六冊勸善書一部計一十九

冊爲善陰騭一部計一十四冊五倫書三部共計七十八冊大明一統志二部共計四十八冊大明會典三部共計一百九冊八閩志二部共計四十冊嘉興府志一部計九冊桐鄉縣志一部計一冊湖州府志一部計六冊武康縣志一部計一冊會稽縣志一部計一十冊上虞縣志一部計二冊蕭山縣志一部計二冊嵊縣志一部計四冊甯波府志一部計四冊慈谿縣志一部計四冊赤城新舊志一部計一十冊甯海縣志一部計二冊金華府志一部計四冊蘭溪縣志一部計二冊嚴州府志一部計十冊遂安縣志計

一冊温州府志一部計六冊處州府志一部計六冊吳興名賢錄一部計二冊金華文統一部計四冊凡一百二十九種洵足備多士之弦誦矣

虎林書院

虎林書院在郡城清河坊北元時爲平淮行庫明因之正統閒命內臣鎮守改爲府嘉靖閒革鎮守改吳山書院後有大臣以鎮撫至仍居其處及新建撫院此名舊府爲散署萬厯三十六年改建書院聶心湯有記中有藏書樓黃汝亨爲記云虎林未有書院有之自中丞甘公始而邑聶侯純中督成之門以內爲

明賢堂進爲凝道堂又進爲友仁堂堂左右爲六館
爲孝廉博士館羣郡邑諸士紳與海內名賢相切劘
講習其閒最後則爲藏書樓以貯載籍而屬寓庸黃
子爲記寓庸子曰噫多乎哉多乎哉易不云乎書不
盡言言不盡意夫繫表之辭文字弗逮也象外之旨
神明所貴也故惠子五車中郎萬卷左史能讀中壘
博極沈酣糟粕漁獵淵藪將以侈富而驚愚也非所
以凝道而統性也是以莊生貽譏於斲輪程子垂誠
于玩物浸于書謂之淫痼于書謂之癖二三君子尊
聞而行知考德而問業可矣爲者有常知者不言奚

書之事而多藏爲聶子進而請曰不然書不盡言故
繇辭以宣言不盡意故模象而示道以人凝文以載
道書以載文義畫旣闢乃有六藝諸史代陳百家攸
萃是故以道陰陽以考政事以理性情以肅名義以
攝威儀以宣律呂三才之精萬物之類皇帝王霸之
乘賢否得失之林元會世運消息理亂之遽更不有
書也其何以識一物不知君子所恥寡見尠聞學者
所陋舍問學而性奚尊焉離博文而禮安措焉故孔
壁留而經存周藏遺而道演天之未喪文不在茲益
神智賁化成所從來矣惡得而廢諸寓庸子曰辯哉

辯哉去彼取此其以明哉雖然張毅內熱單豹外傷
爲害敵也挾筴以遊博塞而逐亡羊等也有陰陽而
後易有性情而後詩有卑高而後禮六經百氏莫不
皆然故克己復禮者博文之歸也寬居仁行者聚學
之旨也悟則書爲筌躧迷卽書爲蔀屋以道通書謂
之畜德以書博道謂之喪志斯不多之祕奧神理之
津筏乎藏珠於淵藏舟於山藏天下於天下聖人之
所洗心於密賢者之所望崖而反也知乎此者藏幾
乎聶子正襟拂席而起曰吾師乎吾師乎道一而已
書實無紀可得而聞一唯斯啟湯也不敏願書爲記

黃子瞿然避座曰惡何敢當何敢當抑師蟻以水師
馬以途物微而旨喻爰以授之副墨證有道焉

杭州諸公署鏤版

陳善萬厯杭府志載諸公署鏤版凡五處巡撫都察
院所刊者爲皇明經濟錄四十一卷籌海圖編十三
卷督撫奏議六卷續督撫奏議六卷俱總督都御史
胡宗憲編諸史將略十六卷知府毛綱錢塘教諭黃
議編大學衍義補纂要六卷餘慶錄一卷俱巡撫都
御史徐枋編礦防考海防考水兵律令陸兵律令水
兵操法陸兵操法各一卷俱巡撫都御史谷中虛撰

布政司所刊者爲禮經會元四卷史纂左編一百四十卷國朝憲章錄四十二卷憲章類編四十二卷皇明詔令二十一卷大明律例七卷問刑條例六卷軍政事例六卷軍政條例四卷賦役成規一卷均平錄一卷廣輿圖一卷浙江通志七十二卷橫渠易說二卷儀禮經傳二十三卷續儀禮經傳三十六卷律呂元聲考注二卷類證本草三十卷食物本草醫方選要十二卷經驗良方十一卷本草醫旨脈訣一卷衛生易簡方四卷太上感應篇一卷文章軌範十卷陶靖節集十卷皇明詩鈔二卷古樂府十卷按察司所

刊者爲鄉校禮輯一卷資治通鑑三百二十四卷文章正宗三十卷條例備考二十四卷大唐六典三十卷疑獄集十卷軍政條例摘鈔十卷官箴集二卷王恭毅公駁稿二卷越絕書十五卷六書正譌六卷韓氏醫通一卷臞仙肘後經二卷歐陽文集四卷岳武穆集十卷釣臺集十卷兩浙運司所刊者爲兩浙離志若干卷巡按御史唐臣撰兩浙鹽法條例五十卷欽依鹽法要覽要覽續編共十四卷行鹽事宜六卷招商事宜一卷場所公費事宜一卷金陀粹編二十卷續編二十四卷四書集註十九卷大明律例七卷

杭州府所刊者爲守令懿範四卷洗冤錄一卷日本
考畧一卷陸王二先生要語二卷百忍箴四卷靈棋
經一卷杭州府志六十三卷西湖游覽志二十四卷
志餘二十六卷武林舊事十卷杭州府水利圖說一
卷子忠肅公奏議十卷亦足見當時地方大吏留意
典籍與今日異也

杭州官刻書

周宏祖輯古今書刻內載浙江布政司所刻有東漢
文鑑西漢文鑑說文救荒活民補遺諸司職掌儀禮
經傳律呂元聲近思錄七修類稿籌海圖編大明律

證類本草國朝憲章食物本草經驗良方醫方選要
史纂凡十七種按察司所刻有疑獄集官箴集要大
明律竹枝詞程史唐鑑資治通鑑條例備考六書正
謫義之十七帖肘後經凡十一種杭州府所刻有大
唐六典四書集註武林遺事禮經會元原病式周禮
始豐稿千家全注唐詩元詩體要韻海唐詩類編宋
學士文粹算方大全詠物新題雪溪漁唱萬竹山房
集帖龍門子羣珠摘粹養生雜帖劉伯溫文集程氏
遺書伊洛淵源四書白文溫公我箴集精忠錄林和
靖集近思錄太白山人詩蓋齋醫要西湖游覽志凡

三十種今則棗梨久蠹細縹罕存按訪卅年遺藁僅
遇殊增思古之感

杭州府學官書

杭學爲浙藩之冠人文之美甲他郡入是學者讀有
用之書儲有用之才文章華國固有以也

本朝順治五年巡臺諸司各捐金修葺十五年李公
率泰等增修秦公世禎重興禮樂規模始備學有尊
經閣本南宋稽古閣遺址舊藏書籍歲久散佚秦公
世禎更命張公安茂纂輯禮樂全書增購書籍備多
士弦誦康熙四十五年頒

御製古文淵鑑資治通鑑等書五十二年

御纂朱子全書成五十四年

御纂周易折中成皆頒發各直省學宮以廣誦習雍
正元年頒

欽定孝經衍義一書三年議准將

聖諭廣訓

御製朋黨論頒發各省學政刊刻刷印齎送各學乾
隆九年奏准

御纂性理精義書詩春秋三經傳說彙纂諸書雖經
頒發然士子眾多不足以資鈔誦令各省督撫藩司

武林齋書錄卷一
三
多行刷印每學每種給發二部以備士子鈔誦其
御纂三禮告成後再行頒給又議准三通諸書令各
督撫酌量置辦乾隆元年議准律書淵源應頒發直
省所屬各學又議准各督撫於省會書院並有尊經
閣之府州縣學應將十三經二十四史諸書購買頒
發交與各該學教官接管二年奏准

日講四書解義每省各頒一部十五年議准

御纂三禮甫經告成奉

旨頒發各省二十九年奉

上諭頒周易述義詩義折中春秋直解於學宮三十

年頒發

御製詩初集二集

御製文初集恭藏學中二百年來士子涵濡教澤樂
育漸摩宜乎文教日新

聖功益懋也

敷文書院

敷文書院在萬松嶺明宏治十一年浙江右參政周
本以廢報恩寺改奉先聖像名萬松書院徵聖裔孔
衢孔績來供祠事嘉靖三十三年重建新建伯王守
仁撰記萬曆五年建繼道堂於毓秀閣北聖裔尙禮

摹鑄聖像於石祀堂中八年朝議毀各書院惟此以
巡按御史謝公師啟僉事喬公因阜之請得不毀我
朝康熙十年范公承謨重修改爲太和書院

仁廟南巡

御書浙水敷文扁額并

頒古文淵鑿淵鑿類函周易折中朱子全書等書藏
於院內徐公元夢又修更名敷文書院增構存誠閣
恭藏

賜書黃公炳捐置學田乾隆十六年奉

上諭經史學之根柢也會城書院聚巽庠之秀而砥

礪之尤宜示之正學朕時巡所至若江甯之鍾山書
院蘇州之紫陽書院杭州之敷文書院各賜武英殿
所刊之十三經二十四史一部資髦士稽古之學先
後

翠華臨幸

召試士子疊奉

明詔

頒賜各書恭藏院中俾諸生觀摩有自居院中者敢
不勤學稽古以仰副
文治之隆哉

仁和學

仁和學書籍見於趙公世安縣志舊存者凡三十部
年久皆廢史記前漢書後漢書三國志晉書宋書南
齊書梁書陳書魏書北齊書周書隋書唐書五代史
通鑑綱目文獻通考杜氏通典古史臨安志高氏春
秋許氏說文劉向新序文公家禮孝經正義丙丁龜
鑑平宋錄息心詮要西湖遺紀救荒活民書欽頌者
凡二十九部今無存御製大誥三篇爲善陰騭五本
性理大全二十九本易經大全一十二本書經大全
五本詩經大全十二本春秋大全十八本禮記大全

十八本四書大全二十本五倫書六十二本溫公資
治通鑑八十本程氏遺書分類六本資治通鑑綱目
四十本續資治通鑑綱目二十六本易經註疏四本
書經註疏五本詩經註疏十五本周禮註疏五本禮
記註疏十六本春秋左傳註疏二十本春秋公羊傳
註疏六本春秋穀梁傳註疏三本孝經註疏一本論
語註疏二本孟子註疏四本儀禮註疏八本爾雅註
疏三本史學二本原正譌考二本又提學道發下書
凡七部五經註疏八十本禮書十五本三禮考註八
十本樂書十五本明倫大典五本大狩龍飛錄二本

文章正宗二十本胡三省註司馬光資治通鑑二本
以上書目考沈朝宣舊志所載雖有缺軼尙多存者
亦可見盛時學校猶有古意隆萬以來士子專尙制
義習爲浮華不知古學毋論學無藏書卽有殘篇斷
簡亦飽蠹魚之腹可勝浩歎哉學在杭郡庠之右明
天順閒由前洋街改建於此

浙江採集遺書

乾隆三十八年閏三月初七日奉

諭江浙人文淵藪其流傳較別省更多果能切實搜
尋自無不漸臻美備聞東南從前藏書最富之家如

崑山徐氏之傳是樓常熟錢氏之述古堂嘉興項氏
之天籟閣朱氏之曝書亭杭州趙氏之小山堂甯波
范氏之天一閣皆其著名者餘亦指不勝屈並有原
藏書目至今尙爲人傳錄者卽其子孫不能保守而
輾轉流播仍爲他姓所有第須尋原究委自不致湮
沒人間縱或散落他方爲之隨處蹤求亦不難于薈
萃又聞蘇州有一種賈客惟事收賣舊書如山塘開
鋪之金姓者乃專門世業於古書存佚原委頗能諳
悉又湖州向多賈客書船平時在各處州縣兌賣書
籍與藏書家往來最熟其於某處舊有某書曾購某

本問之無不深知如能向此等人善爲諮詢詳加物色因而四處借鈔仍將原書迅速發還諒無不踴躍從事至書中卽有忌諱字面並無妨礙現降諭旨甚明卽使將來進到時其中或有妄誕字句不應留以貽惑後學者亦不過將書燬棄轉諭其家不必收存與藏書之人並無干涉必不肯因此加罪至督撫等經手彙送更無關礙又何所用其疑畏乎三十九年浙江巡撫三寶序云疊奉

明詔開誠布公悉蠲禁忌大哉

王言如日中天萬物咸覩浙人士亦遂踴躍奮興競

出所藏以獻其最者如鮑士恭范懋柱汪啟淑及吳玉墀孫仰曾汪汝璉等各獻書五六七百種至二百種以上其餘各郡邑掇拾呈繳收自故家購於書肆無稍滋累於是舊本四出駢集糜至臣董率諸局員矢勤矢慎整理篇帙檢別重複及冗瑣無當者以次敘目入

告統計前後自壬辰冬迄甲午夏凡

奏書十二次爲種四千五百二十三爲卷五萬六千

九百五十五不分卷者二千九十二冊可謂盛矣嘉

善縣學訓導姚江黃璋識云浙中疊奉

恩綸諄切開諭藏書家捆載糜至移局太平坊列屋兼輛充初其中每

奏一次少百餘種多或數百至千餘種不等同事四五人分手趕辦每書開敘姓氏爵里節略必查檢他書而其時又迫於期限遑遑連日夕不輟頭目為暈自壬辰冬至乙未夏作十四次

奏進每次皆然癸巳秋璋與同事朱君休度張君羲年商摧謂吾輩此番之事等於煙雲過眼盍稍述其梗概付之剞劂氏以為浙中掌故乎爰取前所奏底稿重加類次分為自甲至癸十集其十次以下

則分為閏集襄其事者陶君廷珍唐君虞朱君文藻

也總日甲集為易類書類詩類乙集為周禮類儀禮

類禮記類通禮類春秋類丙集為論語類增逸語孝

經類孟子類四書類羣經類樂類爾雅類小學類六

書類丁集為通史類編年類別史類霸史類雜史類

掌故類一 總類 掌故類二 職官 掌故類三 食貨 掌故

類四 儀制 掌故類五 兵刑 掌故類六 河渠 掌故類七

水利 掌故類八 營造 戊集為傳記類一 總類 傳記類

二 以時代為次 傳記類三 以地為次 地理類一 通志

地理類二 各直省 地理類三 山川名勝古跡 地理類

四 異域 史鈔類史學類譜系類已集爲儒家類雜家

類說家類一 總類 庚集爲說家類二 文格詩話 說家

類三 金石書畫 說家類四 小說 藝玩類類事類叢書

類天文術算類五行類兵家類農家類醫家類釋家

類道家類辛集爲總集類一 以時代爲次 總集類二

以地爲次 楚辭類別集類一 唐 壬集爲別集類二 宋

別集類三 宋 別集類四 金元 癸集上爲別集類五 明

別集類六 明 癸集下爲別集類七 明 別集類八 國

朝 閏集 編次照前例不列細目 按在啟淑水曹清暇

錄乾隆三十七年開

四庫館徵訪天下遺書武英殿移取九百種在京各

官進呈九百八十三種直隸總督進呈二百三十八

種奉天府尹進呈三種兩江總督進呈一千三百六

十五種安徽巡撫進呈五百二十三種江蘇巡撫進

呈一千七百二十六種浙江巡撫進呈四千五百八

十八種福建巡撫進呈二百五種江西巡撫進呈八

百五十九種河南巡撫進呈一百十三種山東巡撫

進呈三百七十二種山西巡撫進呈八十八種湖南

巡撫進呈四十六種陝西巡撫進呈一百五種湖北

巡撫進呈八十四種廣東巡撫進呈十二種雲南巡

武木齋書錄卷上
撫進呈四種兩淮鹽院進呈一千五百七十五種共
採訪得書一萬三千七百八十一種永樂大典重纂
修得三百二十一種總不若浙江進呈總數之多云
蔣恭煦有浙江採集遺書總目詩云
丹詔徵文下彩鸞收藏浙水例原寬圖書自拜
天家賜十卷猶留甲午刊

重刊聚珍版諸書

乾隆甲午五月

詔儒臣彙集永樂大典內散見之書重輯成編及世
所罕覩祕籍以活字版印行

賜名聚珍版書每種冠以

御題五言詩十韻前繫小序越三載丁酉九月

頒發其書於東南五省

敕所在鈔勒通行用廣流布一時承

命開雕者江南凡八種江西凡五十四種福建凡一
百二十三種浙江凡三十九種卷帙多寡不一以福
建爲最富以浙江爲最精浙江舊多藏書家拜圖書
集成佩文韻府之

賜者六人沐浴

教澤踴躍咸奮爰仿

內府袖珍版式取便篋衍重刊成書閩浙總督鐘音
浙江巡撫王亶望學政彭元瑞布政司孫含中按察
司國棟督糧道陸允鎮鹽驛道噶爾彌善恭紀於後
督刊者杭州知府邵齊然校字者錢塘教諭韓義瀄
安教諭厲繩泰順教諭姚廷璣試用訓導孫麗春承
刊者大理寺寺丞銜汪汝璫鹽運司運同銜孫仰曾
國子監生鮑士恭錢塘學廩膳生員汪庚書凡二十
函一百二十四冊謹遵

殿本元定價值共計紋銀十二兩五錢八釐五毫九
絲二忽省城振綺堂汪氏壽松堂孫氏大知堂汪氏

知不足齋鮑氏公印通行皆進書之家而承刊者世
又稱三單本迄今百餘年全帙亦罕觀矣

浙江巡撫續進書

仁宗睿皇帝因阮文達奏進四庫未著錄之本一百
七十四種

賜名宛委別藏以補全書所闕仰見金匱石渠蔚然
美備固非宋之崇文明之文淵所可比美也蔣光煦
題擘經室外集絕句云遺書一百七十五曾向

丹墀奏進來原委已教何夢花鮑淥飲訂好從紀陸嗣高

才阮梅叔亨紀云兄官學政巡撫時留意於東南祕

武林齋書錄卷上
書或借自江南舊家或購之蘇州番舶或得之書坊
或鈔自友人凡宋元以前爲

四庫所未收存目所未載者不下百種爲兄訪求購
借者浙之鮑以文廷博何夢華元錫巖厚民杰之力
居多丙寅丁卯閒兄奉諱家居次第校寫共得六十
種每種皆倣

四庫書式加以提要一篇丁卯冬服闋入

覲進呈

乙覽蒙

賜披閱

獎賞有加戊辰己巳復撫浙續寫四十種進呈亦各
爲提要一篇其書亦閒有副本藏於文選樓中阮福
又謹記云家大人在浙時曾購得

四庫未收古書進呈

內府每進一書必仿

四庫提要之式奏進提要一篇凡所考論皆從采訪
之處先查此書原委繼而又屬鮑廷博何元錫諸君
子參互審訂家大人親加改定纂寫而後奏之十數
年久進書一百數十部此提要散藏於揚州及大兄
京邸福因偕弟祐孔厚校刻擘經室集請錄刊提要

於集內家大人諭此篇半不出於已筆卽一篇之中
創改亦復居半文不必存而書應存可別而題之曰
外集凡爲經二十四部史四十部子五十五部集五
十四部凡一百七十有三按原目分五卷不按
四庫次第內嚴器之明理論已見
欽定四庫提要不再重列蔣光煦詩云七十有五豈
別有一本歟

靈隱書藏

嘉慶十四年儀徵阮文達巡撫浙江卽靈隱大悲閣
後創建書藏文達撰記曰周禮掌夫掌官契以治藏

史記老子爲周守藏室之史藏書曰藏古矣古人韻
緩不煩改字收藏之與藏室無二音也漢以後曰觀
曰閣曰庫而不名藏隋唐釋典大備乃有開元釋藏
之日釋道之名藏蓋亦摭儒家之古名也明侯官曹
學佺謂釋道有藏儒何獨無藏欲聚書鼎立其意甚
善而數典未詳嘉慶十四年杭州刻朱文正公翁覃
溪先生諸集將成覃溪先生寓書於紫陽院長石琢
堂狀元曰復初齋集刻成爲我置一部於靈隱仲春
十九日元與顧星橋陳桂堂兩院長暨琢堂狀元郭
頻伽何夢華上舍劉春橋顧簡塘趙晉齋文學同過

靈隱食蔬筍語及藏復初齋集事諸君子復申其議
曰史遷之書藏之名山副在京師白少傅分藏其集
於東林諸寺孫洙得古文苑於佛龕皆因寬閒遠避
之地可傳久也今復初齋一集尙未成箱篋盍使凡
願以其所著所刻所寫所藏之書藏靈隱者皆哀之
其爲藏也大矣元曰諾乃於大悲佛閣後造木廚以
唐文鷲嶺鬱峇堯詩字編爲號選雲林寺玉峯偶然
二僧簿錄管鑰之別訂條例使可永守復刻一銅章
徧印其書而大書其閣扁曰靈隱書藏蓋緣始於復
初諸集而成諸君子立藏之議也遂記之嘉慶十四

年夏五月庚申朔同顧星橋吏部宗泰陳古華大守
廷慶石狀元韞玉三院長暨朱淑堂兵部爲弼蔣秋
吟太史詩華秋槎瑞璜何夢華元錫王柳邨豫頂秋
子墉張秋水鑑諸君子集靈隱置書藏紀事尙書未
百篇春秋疑斷爛列史志藝文分卷本億萬傳之百
千年存世不及半近代多書樓難聚易分散或者古
名山與俗隔厓岸峇堯靈隱峯琳宮敞樓觀共爲藏
書來藏室特修建學人苦著書難殺竹青汗若非見
著錄何必弄柔翰舟車易遺亡水火爲患難子孫重
田園棄此等塗炭朋友諾黃金文字任失竄或以經

覆瓿或以詩投溷當年無副本佚後每長歎豈如香山寺全集不亂散名家勒巨帙精神本注貫逸民老田閒不見亦無悶雖不待藏傳得藏亦所願我今立藏法似定禪家案諸友以書來收藏持一券他年七十幘卷軸積無算或有訪書人伏閣細披看古人好事心試共後人論既泛西湖舟旋飽蔬筍飯出寺夕陽殘鶯嶺風泉渙其條例凡九一送書入藏者寺僧轉給一收到字票一書不分部惟以次第分號收滿驚一號廚再收嶺字號廚一印鈐書面暨書首葉每本皆然一每書或寫書腦或掛絲紙籤以便查檢一

守藏僧二人由鹽運司月給香錠銀陸兩其送書來者或給以錢則積之以爲修書堦廚之用不給勿索一書既入藏不許復出縱有繙閱之人但在閣中毋出閣門寺僧有鬻借霉亂者外人有攜竊塗損者皆究之一印內及簿內部字之上分經史子集填注之疑者闕之一唐人詩內複對天二字將來編爲後對後大二字一守藏僧如出缺由方丈秉公舉明靜謹細之僧充補之當時郭麐爲後記翁方綱楊鳳苞李富孫陳文述曹言純諸先生俱有題詠洵屬湖山韻事復初先生詩作於嘉慶己巳清詞麗句允稱傑作

詩云靈隱藏書事孰始始自杭刻朱翁詩朱公未及
藏記讀阮公索我書之碑我詩已愧阮公刻緣此議
藏能毋嗤同人去夏集湖上石子鐫我禪壁詞僉曰
一集未盈篋盍訪曹氏書倉爲遂啟佛閣廚七十以
備續度籤裝治主以二僧編以例匡廬白石甯聞茲
石子書來趣函寄正我盥寫金經時古稱大都與通
邑名山藏副於京師名山名利更增重豈比家刻傳
其私苟非懸之免指摘或且倍甚來瑕疵往者新城
王叟集青藜劉君隸寫之頭藏嵩少果踐否林吉人
楷名空馳嗚呼寸心千古事甚於鏡影公妍媸念此

仿惶汗浹背顧緘油素又屢遲上有靈峯下湖水鑿
我樸拙心無歐繼有裏函來寺者何以助我加箴規
寫經微願那足補日日齋旃勤三思

浙江書局

成化志設局於接待寺萬厯志設局於褒忠祠李敏
達於南關樞署修西湖志乾隆閒就崇文書院四賢
祠恭纂

南巡盛典更在太平坊設局採訪遺書以進

四庫館阮文達集高才生於詒經精舍編經籍纂詁
輶軒詩錄諸書自來集事莫不有局如百工之居肆

也杭州庚辛劫後經籍蕩然同治六年撫浙使者馬
端敏公加意文學聘薛慰農觀察時雨孫琴西太僕
衣言首刊經史兼及子集

奏開書局於篁庵並處校士於聽園派提調以監之
選士子有文行者總而校之集劄劄氏百十人以寫
刊之議有章程十二條自丁卯開局至光緒乙酉凡
二十年先後刊刻二百餘種甲部則

御纂七經詩義折中四書集註五經尙書考異四書
約旨論語後案乙部則新舊唐書宋史九通

御批通鑑輯覽續資治通鑑長編金陀粹編理學宗

傳胡端敏奏議兩浙金石志西湖志平浙紀畧丙部
則二十二子玉海武經大學衍義丁部則唐宋文粹
古文淵鑑蘇詩編註集成王文成公集輜軒錄沈氏
三先生集皆覓善本精校重刻墨模綫訂流傳海內
後之藏書者珍逾宋元而上矣

武林藏書錄卷上終

武林藏書錄卷中

范子安

錢塘丁申撰

范平字子安錢塘人研覽墳索徧該百氏姚信賀邵之徒皆從受業吳時舉茂才累遷臨海太守政有異能孫皓初謝病還家吳平太康中頻召不起年六十九卒詔追謚文正先生三子爽咸泉並以儒學至大官泉子蔚關內侯家世好學有書七千餘卷遠近來讀者常百餘人蔚爲辨衣食蔚子文才亦幼知名見晉書本傳陳頤道文述懷范子安詩有七錄香芸新

正木齋書錄卷中
一
祕閣百年黃葉舊江村一聯以子安先生故居在江上也

褚季雅

褚陶字季雅錢塘人弱不好弄清閒淡默以墳典自娛年十三作鷗鳥水磴二賦見者奇之嘗謂所親聖賢備在黃卷中捨此何求州郡辟不就吳平召補尚書郎張華見之謂陸機曰君兄弟雲躍龍津顧彥先鳳鳴朝陽謂東南之寶已盡不意復見褚生機曰公但未覩不鳴不躍者耳華曰故知延門之德不孤川嶽之寶不匱矣遷九真太守轉中尉按陳頤道懷褚

季雅先生詩有西京典籍同劉向南國藏書匹范平之句晉書本傳稱其以墳典自娛足徵收藏之富矣宋時有褚含褚邊皆其苗裔

錢希聖

錢惟演字希聖幼有俊才倣嘗使賦遠山詩有高爲天一柱秀作海三峯之句倣深器之咸平中獻其所爲文拜太僕少卿擢知制誥翰林學士拜樞密副使加尚書右丞轉工部尚書仁宗卽位進兵部尚書爲樞密使除保大軍節度使知河陽請覲加同平章事判許州改鎮武勝又徙秦甯上耕籍入侍嗣爲景靈

宮使判河南改鎮崇信卒贈侍中諡文僖惟演少富
貴能志於學有文章與楊億劉子儀齊名嘗曰學士
備顧問不可不該博故其家聚書侷於祕府又多藏
古書畫在館閣與修冊府元龜凡千篇詔楊億分爲
之所著有典懿集樞庭擁旄前後集伊川漢上集金
坡遺事錄飛白書敘錄逢辰錄奉藩書事鮑由爲其
眞贊謂西崑體律如有唐掌我帝制登玉堂實以文
擅世云見東都事略及夷白堂集

錢氏書藏

宋錢儼字岳父吳越王後以孝義著居九里松之間

嘗建傑閣藏書甚富東坡榜之曰錢氏書藏仕至直
祕閣知荆南府墓在靈隱天竺兩山之中處州府志
載熙寧閒以光祿寺丞出知龍泉縣朝廷初更新法
編次保伍人情駭異儼諭以德意民始安輯爲政務
簡易必便於民及去老幼思之立去思堂吳充作記
兄勰字穆父有寄弟詩云東方千騎擁朱輪衣錦歸
逢故國春莫向西湖戀風月鶴原知有望歸人儼答
詩云烏衣巷裏走雙輪正是家山二月春明日湖平
定歸去蓬萊還見謫仙人又蘇軾和錢四寄其弟儼
詩云再見瀟頭湧玉輪煩君久駐浙江春年來總作

維摩病堪笑東西二老人施注錢四蓋穆父蘇字思
父時穆父守越公守杭故云東西二老人又注次韻
錢穆父詩云穆父名勰吳越讓王諸孫以蔭入官元
祐初拜中書舍人哲宗涖政入翰林罷知池州以卒
後追復龍圖閣學士嘗見香祖筆記歷數宋人藏書
有錢穆父是兄弟皆好藏書也

釋文瑩

文瑩玉壺清話序云玉壺隱居之潭也文瑩收古今
文章著述最多自國朝至熙寧閒得文集二百餘家
文瑩至長沙首訪故國馬氏天策府諸學士所著文

章擅其名者惟徐東野李宏皋東野詩浮脆輕豔侑
一時尊俎爾宏皋雜文十卷皆駢枝章句雖齷齪者
能道信乎行文之難也又續湘山野錄王平甫安國
奉詔定蜀民楚民秦民三家所獻書可入三館者令
令史李希顏料理之其書多剝脫而得一敝紙所書
花蕊夫人詩乃花蕊手寫而其記甚奇棄之可惜遂
令令史郭祥繕寫入三館禹玉相公傳其本於是盛
行於時文瑩親於平甫處得副本凡三十二章按鮑
廷博玉壺清話跋宋僧文瑩字道溫錢塘人工詩喜
藏書尤留心當世之務

關氏藏書

關景仁字彥長錢塘人嘉祐四年進士嗜學好古藏書甚富子注字子東紹興五年進士承其家學益增其所未備嘗教授湖州與胡瑗之孫滌裒瑗遺書得易解中庸義藏之學官又錄瑗言行爲一帙意在美風俗新人材仕至大學博士卒自號香巖居士有關博士集二十卷行於世見武林耆舊集及宋詩紀事

吳子發

吳如愚字子發錢塘人家世以積善聞至武翼公益茂厥鍾先生生而岐嶷骨象異凡武翼居閒垂二十

載篤意義方擇名士爲師課之家多藏書一覽成誦輒通曉大義甫弱冠於諸子百家靡不究竟定省餘閒刻意經學所得日富世味澹然不以仕進爲念安貧樂道私淑同志扁其室曰準齋趙公彥懌雅厚先生嘗奉詔以賢能才識舉端平更化復以行義純固可爲師表薦嘉熙戊戌孔山喬當國特授從政郎充祕閣校勘先生三辭有旨吳某重更父澤而就文懇免祕書之列屬高風可尙雅志當從特轉秉義郎差監襲慶府東嶽廟任使居住孔山論薦之日上問所著何書孔山遣所厚求所著來上先生辭曰未畢蓋

有深意於是先生踐履之實益孚於人永嘉陳君昉
登朝日親炙不倦得所著述退輒錄之刻爲一編惠
其同志臨川羅君愚復刻於廣右漕臺所傳益廣矣
所著書已刊已授之外猶存手稿十五冊或以書問
發明義理或以酬唱形諸賦詠或解經析理爲之訓
說篇目尙多方將類篇別爲一集以傳見徐元杰棗
莖集吳公行述觀其著述之淵博足徵收藏之美富
也

陳宗之芸居樓

錢塘陳宗之起事母孝寧宗時鄉貢第一人稱陳解

元居睦親坊開肆鬻書自稱陳道人著芸居乙稿凡
江湖詩人皆與之善取名人小集數十家選爲江湖
集鄭斯立贈詩云昔人耽隱約屠沽身亦安矧伊叢
古書枕籍於其閒讀書博詩趣鬻書奉親歡君能有
此樂冷然世所難劉克莊贈詩云陳侯生長紛繁地
卻以芸香自沐薰鍊句豈非林處士鬻書莫是穆參
軍雨檐兀坐忘春去雪案清談至夜分何日我閒君
閒肆扁舟同泛北山雲葉茵贈句云得書授與世人
讀選句長教野客吟趙師秀贈賣書陳秀才云四圍
皆古今永日坐中心門對官河水檐依柳樹陰每留

名士飲屢索老夫吟最感書燒盡時容借檢尋危種
贈詩云兀坐書林自切磋閱人應自閱書多未知買
得君書去不負君書人幾何方回瀛奎律髓詩注寶
慶初史彌遠專權陸親坊書肆陳宗之刊江湖集以
售劉潛夫南岳稿與焉宗之詩有云秋雨梧桐皇子
府春風楊柳相公橋哀濟邸而謂彌遠也或嫁秋雨
春風爲敖器之詩言者并潛夫梅詩論列劈江湖集
版二人皆坐罪而宗之坐流配於是詔禁士大夫作
詩紹定癸巳彌遠死詩禁始解迄今六百年江湖集
外殘刻流傳若畫繼見於

天祿琳瑯釋名碧雲集見於愛日精廬藏書志朱慶
餘詩集唐僧宏秀集見於士禮居題跋記李賀歌詩
李羣玉詩梅花納見於田裕齋藏書志賓退錄呂叔
和集孟東野集許丁卯集周賀詩集見於甯宋樓藏
書志雖一鱗片羽人已神龍威鳳視之矣

小陳道人思

夢梁錄杭城市肆有名者橋園亭文籍書房行都記
事橋園亭在豐樂橋北自棚橋直穿卽是也當時書
肆林立著名者陳起之後又有陳思起自稱道人世
遂稱思爲小陳道人石門顧君修據宋本羣賢小集

重刊疑思爲起之子稱起之字芸居思之字續芸所居睦親坊棚北大街地亦相近然終不得其確據思所著有寶刻叢編海棠譜書小史書苑英華小字錄及兩宋名賢小集小字錄前有結銜稱成忠郎緝熙殿國史實錄院祕書省搜訪又海棠譜自序稱開慶元年則理宗時人也按寶刻叢編紹定二年鶴山翁序曰余無他嗜惟書癖殆不可醫臨安陳思多爲余收攬叩其書顛末輒對如響一日以其所粹寶刻叢編見寄且求一言蓋屢卻而請不已發而視之地世年行炯然在目嗚呼賈人鬪書於肆而善其事若此

可以爲士而不如乎撫卷太息書而歸之又直齋陳伯玉序云都人陳思僨書於都市士之好古博雅蒐遺獵忘以足其所藏與夫故家之淪墜不振出其所藏以求售者往往交於其肆且售且僨久而所閱滋多望之輒能別其真贗一旦盡取讀書所錄輯爲一編以今九域京府州縣爲本而繫其名物於左昔人辨證審定之語具著之又咸涖閒天台謝愈修書小史序曰書小史者陳道人所編道人趣尙之雅編類之勤可謂不苟於用心矣予識之五十餘年每刻一部必先來訪訂證名帖飽窺異書愈久而愈不相忘

亦未易多得也 四庫提要載兩宋名賢小集三百八十卷題宋陳思編元陳世隆補所錄宋人詩集始於楊億終於潘音凡一百五十七家有紹定三年魏了翁序與寶刻叢編序惟更書名數字僞託無疑國朝朱彝尊跋中謂是書又稱爲江湖集於寶慶紹定閒史彌遠疑有謗己之言牽連逮捕思亦不免詩版遂毀案刊江湖者乃陳起非陳思且江湖集皆南宋以後之人而是書起自楊億宋白二書迥異彝尊牽合爲一紕繆殊甚然考彝尊曝書亭集有宋高菊圃遺稿序中述陳起罹禍之事甚悉未嘗混及陳思

而集中不載此跋當由近人依託爲之又跋內稱陳世隆爲思從孫于思所編六十家外增輯百四十家稿本散佚按世隆字彥高嘗館嘉禾陶氏至正閒沒於兵錢大昕藝圃搜奇跋云元末錢唐陳世隆彥南天台徐一夔大章避兵樵李相善彥高篋中攜祕書數十種檢有副本悉以贈大章大章彙而編之世無刊本彥南著有北軒筆記文選補遺及宋詩拾遺二十三卷其選輯當代詩篇猶承陳氏遺派故題曰拾遺其書今尙有流傳者朱氏增輯之說亦難盡信然贗託者所編之詩實出棚北大街所刊宋人遺稿藉

以蒼粹木本水源不得不歸功於思也

董靜傳書樓

董靜傳名嗣杲錢塘人寄跡黃冠中博辨強記談前朝典故如指掌作詩詞不經思索嘗著西湖百詠仇山村遠董靜傳挂冠孤山四聖觀詩云靜按秋淥洗荷衣閒隱孤山隻鶴隨得酒可謀千日醉挂冠猶恨十年遲雲和家有仙人譜石鼎今無道士詩莫對梅花談世事此花曾見太平時張玉田炎有自東越還西湖飲靜傳董高士書樓詞

蓀壁山房

萬厯錢塘縣志金應桂字一之能詞章宋季爲縣令入元隱居風篁嶺書學歐陽詢畫學李龍眠晚居西湖南山築蓀壁山房中設圖史客至撫摩諦翫清談纒纒不休每肩輿入城府幅巾氅衣望之若神仙然按一之有送張仲實遊大滌洞天詩見武林耆舊集

張子昭

鄭元祐張子昭墓志張雯字子昭其先浚儀人祖父世居吳雯少嗜學時宋社已屋三十稔矣故老遺黎猶有存者子昭從其人問宋遺事得其什一喜游錢塘山川城邑徘徊躑躅感歎不能已兼通聲律家臨

市衢構樓蓄書自經傳子史下逮稗官百家無不備
口繙閱研究年六十四卒於至正十六年十一月子
田次子里孫男一名肯按杭州府志及錢塘縣志雯
南渡居錢塘力學嗜書精律呂每眾坐聞樂輒俯首
嘖蹙曰吾其不免乎於時宋亡故宮老校猶有存者
從之問宋遺事朝廷宗廟宮室輿服朝會宴享生殺
咸得其詳所著書曰繼潛錄書畫補遺墨記子田字
耘已亦工文詞田子肯字繼孟一字寄夢從宋濂學
並列文苑傳是雯居於錢塘而子孫遂世爲杭人趙
氏書目說文解字有子昭印鐵琴銅劍樓書目簡齋

外集有張子昭印皆雯之所藏也

吾子行

吾衍字子行杭人意氣簡傲不爲公侯屈色嘗自比
於郭忠恕居生花坊一小樓樓上圖書四壁坐對竟
日無倦容客至僮輒止之通姓名使登乃登廉訪使
徐琰一日來見衍從樓上呼曰此樓何敢當貴人登
耶願明日謁謝琰聞之笑而去衍亦卒不往生徒從
衍遊者常數十百人宋濂爲之撰傳按妮古錄宛邱
趙期頤以書名世得之吾衍者爲多衍所著書有尙
書要略聽元造化集九歌譜十二月樂辭譜重正卦

氣楚史檮杌晉文春秋通書援神契說文續解石鼓
咀楚文音釋閒中編竹素山房詩余又鈔得閒居錄
一卷觀趙氏收藏之富即可見子行先生之所藏必
更多於趙氏其著書傳於今者尙有周秦刻石釋音
學古編爲陳眉公所未見知當日著書尙不止此惜
妮古錄所列書目今又散佚過半其言刊書版始於
周美成謂之倚書牀見美成文集觀其所論可知其
所藏矣

張貞居

張雨字伯雨號貞居錢塘人寄跡黃冠少從其師王

壽衍入京師以詩見賞於閒閒宗師送之翰林集賢
袁伯長虞伯生揭曼碩諸公和之由是名大起晚居
三茅觀修立史歷紀道家高士自序曰老子立足者
也是集不與焉尊之也作黃篋樓儲古圖史作水軒
於浴鵠灣營墓於靈石鵬售繫腰作梁名玉鉤橋橋
南數十步作藏書石室自勒銘而吳睿隸古所著出
世集三卷碧巖立會錄三卷尋山志十五卷貞居集
七卷元季紅巾寇杭而諸書散佚其亡也楊廉夫悼
之詩云黃篋樓頭仙一去明年黃篋埽狼烽不知天
上修立史只訝山中伴赤松石室祕書愁攝電星池

遺劍已成龍思君不見夜開戶月在金鐘玉几峰見
西湖游覽志餘

張仲實

牟巖學古齋詩稿序云仲實生五侯家不有其富貴
力學自課如諸生閒關多難度無所展用始以詩名
予與以女諸公輒舉手賀得佳婿比過其家書數束
茶數串泊如也按王沂撰仲實行述云先生諱模曾
祖宗尹宋贈朝議大夫祖瀟宋武德大夫閤門舍人
父淦忠翊郎幼而警敏甫冠而學業大成是時宋社
旣墟而典章文物猶存咸濱閒士淫於舉業先生猶

銳意復古學於經闡明奧旨初用舉者起家爲杭儒
學錄尋遷宜興教授轉平江府儒學擢南浙都轉鹽
運司使知事有學古齋稿格物編先生承先世之遺
圖書富有曾與鄧善之分一室居相與讀書其中如
此者十年戴表元學古齋記稱早起盥沐焚香振冊
知其得力於簡策者良有以也

青門處士

元至正閒杭魏一愚自號青門處士醇懿靚深恆懼
外撓閉置一室中如處女然雖重客不得面周親謁
請或一見卽退平日危坐閱所蓄書幾萬卷默味其

武林藏書錄卷中
三
旨其言行可爲人勸者疏以示諸子凡積爲若干頁
歿後三月而紅巾寇杭處士之廬與堞舍同燬方諸
公孫述黃巢時隱人李業周朴輩不免其身處士何
幸哉楊廉夫爲作墓銘

尊德堂

錢塘凌柘軒先生諱雲翰字彥翀生元至治癸亥歲
好學博通經文潛心周孔之書處一室左圖右書講
習其間研幾極深嚴寒盛暑不輟至正己亥浙省以
便宜開科取士登鄉試榜以道梗不及赴都授蘭亭
書院山長洪武辛酉以薦舉召授四川成都教授子

鵠字正齋舉通經人才以母老乞歸其孫文顯能不
墜其業文顯子昱字敬輿景泰庚午舉人輯先生詩
文若干卷命子暹繕寫成帙名柘軒集瞿宗吉爲之
序云柘軒凌先生與予衡齋叔祖爲同年友予與先
生別五十年矣宣德初自山後召還北京先生曾孫
暹來見求爲尊德堂製記蓋先生在日所蓄前代典
籍甚富暹父敬輿收藏無遺於所居作堂崇奉之可
謂知所尊者矣今予告老賜歸則先生所作若文若
詩已悉彙次成集矣乞爲校正且俾爲序予不敢辭
凌氏當有明盛時收藏圖籍自經史及諸子百家以

至稗官小說靡不兼收並蓄又有賢孫曾寶惜而珍藏之以貽後世足徵詩書之流澤長矣初居義和安國里嗣築別業於湖墅夾城巷尊德堂則別業之最勝處也

王儀之

王羽字儀之錢塘人洪武庚午解元辛未進士爲人端重簡靜文章悉根義理家富藏書鑒別最精與修五經四書性理大全厯官禮部儀制司郎中陞太常少卿乞歸改餘杭教授卒杭州府志入名臣傳錢塘志入文苑傳

張氏藏書

嘉靖仁和志張翱原名珍字濟時一字羽皋號介然生洪武甲戌其先汴人扈駕南渡始寓錢塘後徙仁和睦親坊自幼穎異氣宇冲粹嘗業儒探索隱奧五經六史靡不究心尤精周易暇則涉獵九流百家之書至於推步天文往往奇中或時占風望氣其應立見若神授者家世厚積傳及乃父彬富甲里閭翱志出塵視財若澆其所應得者悉以歸兄惟知進修日益淵邃以故時多推重宣德閒兩廣多事有潘中丞者浙人也將往視師素知翱有兵畧且習占候特迎

以往除舍居之翺感知已百凡事務悉爲經畫一日
坐帳中仰視聞忽片雲隱起謂潘曰事濟矣烈風南
來乃賊敗兆已而果然潘欲特疏薦用翺誓不仕遂
逃名晦迹晚歲垂情著述多散逸不存嘗自述曰有
意欲嘗千日酒無心去傍五侯煙夜寒荷葉杯中飲
春暖梅花紙帳眠復諭厥子曰無患枝未茂將來日
繁況有充闔者出焉延至今日科第聯芳各自期待
如張應祺以進士而隨授主事張應祐以鄉薦而爲
通判皆曾孫也張瀚以進士而擢知府張濂以進士
而擢通政使張洽以進士而任主事張洵張溥則又

以鄉薦而候春官皆元孫也其他懷珍待聘者後先
相望而益服翺之先見年八十二無疾而逝申按張
氏家乘張瀚歷官至吏部尙書諡恭毅著有臺省疏
稿松窗夢語奚囊蠹餘迄恭懿公而下繇甲科登仕
籍百餘人郡城北司前石闕上書恩榮世美四字而
以官闕題名其右惜道光甲辰之夏燬於火今惟駐
防營中大納言坊尙屹然峙也流澤旣長藏書遂富
卽張氏名人著述如東川集不惑堂文集寵壽堂詩
燕臺文稿西園詩集靑林文集河清集秦亭集白雲
集冰崖詩兩峰詩見心堂詩兩閒書屋集唐詩林溪

集蓋翁詩鈔諸籍指不勝屈自明迄今幾四百年歷
數武林閥閱之家必以張氏爲巨擘而儲藏之富日
積月累遂爲武林諸藏書家之冠嘗讀王氏居易錄
云杭州孝廉高式青說其鄉張氏藏書甚富造樓水
中皮置甲乙悉有次第以小舟通之晡後卽禁往來
一日忽有煙氣出樓窗大驚往視之則門扃如故比
登樓煙亦不見如是者三最後細檢視煙自書櫥中
出開櫥則凡天文奇遁之書悉爲燼惟空函在焉餘
書無恙其名號及居址則無從考核然天文奇遁之
書惟介然公能精其術其後人若愛山公應楨新齋

公沈惕庵公梯秀夫公中發允曾公錫蔭兩湖公永
祚誠然公果俱能仰承家學兩湖尤精九章算法官
欽天監博士著有天文律歷志二十卷特記之以俟
後之考古者

洪氏列代藏書

洪鐘字宣之錢塘人成化乙未進士歷官刑工二部
尙書左都御史加太子少保賜玉帶出總川陝湖河
四省軍務賜白金麟眼進太子太保卒謚襄惠生平
好積書其命子作有汝父慕清白遺無金滿籬望汝
成大賢惟教以一經經書宜博學無憚歷艱辛才以

博而堅業由勤而精之句可以規其家學矣子澄字
靜夫號西溪正德庚午舉人官中翰詔誥雅贍大學
士商輅深重之孫楨字子美蔭詹事府主簿承先世
之遺縹緗積益餘事校刊既精且多迄今流傳者如
路史見於

天祿琳瑯稱其校印頗佳深於嗜古文選見於平津
館鑒賞記田叔禾序稱其得宋本重刊校讐精緻逾
於他刻且文雅有足稱者曾孫瞻祖字詒孫號清遠
萬厯戊戌進士由庶吉士授兵科給事中官至右都
御史巡撫南贛有清遠山人稿府志入名臣傳元孫

吉臣字載之與弟吉輝吉符並有文譽時人爲之詩
曰城西有三洪英英文字雄吉輝舉萬厯戊午鄉試
早卒吉臣崇禎癸酉順天鄉舉庚辰會試副榜進士
官德安府推官出俸振濟十七次民得全活六邑人
士作歌紀德所著書有明文喬二十一史識餘學圃
蘆蘇警世錄後場類典羣書備考藏於家洪氏自宋
忠宣公遷杭以來青箱世守代有科名我朝若瞻
祖之元孫應星熊星均成進士弧星舉人來孫清塵
丁酉鄉薦又吉暉之來孫文炳乾隆戊子舉人文炳
子廷亮乾隆戊申舉人廷亮子鼎元道光乙未舉人

武林藏書錄卷中
鼎元子昌燕道光癸卯舉人咸豐丙申探花昌許咸
豐辛亥舉人昌燕子衍慶補行咸豐癸亥舉人世澤
貽謀罕有倫比附記之以徵詩書之報云

高瑞南

高濂字深甫號瑞南仁和人著雅尚齋詩草頗得自
然之趣嘗築山滿樓於跨虹橋收藏古今書籍其印
記曰妙賞樓藏書曰高氏鑑定宋刻版書曰武林高
深父妙賞樓藏書又有五岳真形印每册首皆用之
著遵生八牋十九卷第六牋曰燕閒清賞皆賞鑒清
玩之事其論藏書云藏書以資博洽爲丈夫子生平

第一要事其中有二說焉家素者無資以蓄書家豐
者性不喜見書故古人因貧日就書肆鄰家讀書者
有之求其富而好學則未多見也卽有富而好書不
樂讀誦務得善本綾綺裝飾置之華齋以具觀美塵
積盈寸經年不識主人一面書何逸哉噫能如是猶
勝不喜見者矣藏書者無問冊帙美惡意惟欲搜奇
索隱得見古人一言一論之祕以廣心胷未識未聞
至於夢寐嗜好遠近訪求自經書一史百家九流詩
文傳記稗野雜著二氏經典靡不兼收故嘗耽書每
見新異之典不論價之貴賤以必得爲期其好亦專

武林藏書錄卷中
矣故積書充棟類聚門分時乎開函攤几俾長日深
更沈潛玩索恍對聖賢面談千古悅心快目何樂可
勝古云開卷有益豈欺我哉不學無術深可恥也又
如宋元刻書雕鏤不苟校閱不訛書寫肥細有則印
刷清朗況多奇書未經后人重刻惜不多見佛氏醫
家二類更富然醫方一字差誤其害匪輕故以宋刻
爲善海內名家評書次第爲價之重輕以墳典六經
騷國史記漢書文選爲最以詩集百家次之文集道
釋二書又其次也宋人之書紙堅刻軟字畫如寫格
用單邊閒多諱字用墨稀薄雖著水溼燥無溼迹開

卷一種書香自生異味元刻仿宋單邊字畫不分麤
細較宋邊條闊多一線紙鬆刻硬用墨穢濁中無諱
字開卷了無臭味有種官券殘紙背印更惡宋版書
刻以活襯竹紙爲佳而蠶繭紙鵠白紙藤紙固美而
存遺不廣若餽背宋書則不佳矣余見宋刻大版漢
書不惟內紙堅白每本用澄心堂紙數幅爲副今歸
吳中真不可得又若宋版書在元印或元補欠缺時
人執爲宋刻元版遺至國初或國初補欠人亦執爲
元刻然而以元補宋其去宋近未易辨以國初補元
內有單邊雙邊之異且字刻迥然別矣何必辨論若

國初慎獨齋刻書似亦精美近日作假宋版書神妙莫測將新刻模宋版書特鈔微黃厚實竹紙或用川中繭紙或用糊稍方簾絲紙或用孩兒白鹿紙筒卷用槌細細敲過名之曰刮以墨浸去臭味印成或將新刻版中殘缺一二要處或涇徽三五張破碎重補或改刻開卷一二序文年號或貼過今人註刻名氏留空另刻小印將宋人姓氏扣填兩頭角處或妝摩損用砂石磨去一角或作一二缺痕以燎火燎去紙尾仍用草煙熏黃儼狀古人殘傷舊跡或置蛙米櫃中令蟲蝕作透漏蛀孔或以鐵線燒紅隨書本子委

曲成眼一二轉折種種與新不同用紙裝襯綾錦套殼入手重實光膩可觀初非今書彷彿以惑售者或札夥固令人先聲指爲故家某姓所遺百計瞽人莫可窺測多混名家收藏者當具真眼辨證讀其藏書之論可想其藏書之富謹按

天祿琳瑯收其所藏太學新編排韻字類

純廟冠以宸題鈐以

御寶載其收藏印記曰古杭瑞南高氏深甫藏書記又明版漢書有高氏家藏書畫印瑞南二印流傳三百餘年間存碩果不啻寶玉大弓視之矣又按黃蕘

正林藏書錄卷中
三
圃玄珠密語跋中有古杭高氏藏書印高瑞南明中
葉藏書家何夢華有宋刊朱氏集驗方余舊藏宋本
外臺祕要亦有其圖記

郎仁寶

郎瑛字仁寶仁和人人生有異質少長博綜藝文肆意
探討素有疾澹於進取有愛之者曰如後時何瑛曰
吾已委身載籍矣尙復與少年競筆札耶督學潮陽
盛公惜其才學欲推挽之卒謝不出家所藏經籍書
史文章雜家言甚盛日危坐諷讀其中攬要咀華刺
瑕指類辯同異得失著書凡數種四方見其書無不

願託交者正德末寧藩逆節始萌瑛先以爲憂及聞
陽明先生在贛喜曰豎子不足平矣事母孝有疾再
刲股再愈所著有萃忠錄二卷書史袞鉞六十卷七
修類稿五十五卷見趙世安仁和縣志

方承天

方九敘字承天錢塘人少慕於古冀託不朽長與海
內諸名家倡和甚有稱釋褐除兵部主事守山海關
明習邊務將卒憚服葺倉貯穀散種食於民不徵息
多購羣書勤爲士子講析比行羣下泣送載路官至
承天太守天性毅直屢忤鉅璫罷歸益討故業聚書

至數萬卷易綺麗入冲雅爲人高朗善論事才不究
用咸惜之所著有方承天遺稿見萬厯錢塘縣志武
林耆舊錄

呂氏樾館

呂園在塘棲鎮北呂都事北野與弟鴻臚寺丞水山
別墅也積石累山規模宏敞其藏書之所曰樾館王
伯穀篆額曰喜聲館陳眉公題額曰縣慶樓文衡山
書額曰一本堂周天球書額北野子似野官光祿肖
野官太僕當時賓客之盛第宅之侈甲於杭郡文徵
明贈似野詩云而翁北野擅聲華令子才情亦稱家

王穀祥贈肖野詩云浙中今古多才彥喜見名家有
後人何東甫塘棲志略稱棲鎮藏書之富推呂氏北
野卓氏入齋呂氏卽所謂樾館也可想見當時之盛
矣

虞長孺僧孺兩先生

錢塘虞淳熙字長孺萬厯癸未進士授兵部職方主
事遷主客員外補稽勳郎以耿介見嫉削職歸隱回
峰別業曰讀書林力不能購異書與弟閉門鈔書晝
夜不止有武庫行祕書之目著德園先生集墓在七
十二賢峰下黃汝亨作墓誌弟僧孺名淳貞終身不

娶結廬靈隱寺側曰狻猊居役使僅一老僕又建八角團瓢於每角藏書上有樓可眺遠陳文述狻猊居詩云何處青山狻猊居鷲峰深處有吾廬但餘蕭僕空林靜并少梅妻夜月虛鐘梵一樓堪眺遠團瓢四面好藏書漢陂兄弟真無忝極目回峰樹影疏

文會堂

仁和胡文煥字德甫號全菴一號抱琴居士嘗於萬曆天啟閒構文會堂藏書設肆流通古籍刊格致叢書至三四百種名人賢達多爲序跋自著琴譜六卷凡分十八條皆論琴後十一條皆論鼓琴之事

翁氏書閣

翁氏書閣在安樂山下永興寺前臨永興湖崇禎初翁氏兄弟構書閣於此陳頤道文述詩云錢氏有書藏翁氏有書閣可惜所藏書今日已零落樵人識遺址一峰指安樂按浙江通志循吏傳翁汝遇字子先仁和人萬曆戊戌進士授東莞令權蕪湖關最後守朝歌俱有惠政所在尸祝弟汝進字獻甫萬曆乙未進士授興化令疏河四百餘丈東入海建四門石關以爲水防歷官至山東參議以忤逆璫罷歸閣建於崇禎初正當兩先生歸田後也

寶名樓

錢塘吳繼志官雲南越州衛經歷好聚書且勤掌錄
祕閣之鈔逾萬卷及子宮允鼎貴則家益有賜書軸
帶帙籤至與山陰祁氏海虞錢氏埒宮允名太冲字
默寘海寧籍弱齡沈酣六籍天啟丁卯登賢書崇禎
辛未成進士選翰林院庶吉士授檢討改編修量移
南國子監司業轉右春坊右中允生平侃侃直言尤
以正人心敦士行破門戶爲急後慶百徵君構寶名
樓於別業之梧園儲書其上與弟農復登樓而去其
梯戒不聞世上語盡發所藏書讀之見方婺如吳徵

君傳按杭郡詩輯徵君名農祥字慶百號星叟一號
大滌山樵康熙己未薦試鴻博有梧園詩文集年十
三就館甥舍命作芙蓉賦援筆立就 國初老屋入
圈屯中惟圖籍無恙因移於孩兒巷之梧園農復字
敦仲號來菴錢塘諸生性至孝嘗割股療母有來菴
存稿

卓氏傳經堂

仁和卓擘初名顯卿字襄野號寓庸別號入齋倡明
經學士林嚮風長子發之字左車號蓮旬天資高邁
有將相才崇禎癸酉鄉薦副車有漉籬堂集孫人月

字珂月別號蕊淵拔貢生才情橫溢以未遇早逝有
蕊淵瞻臺兩集家學相傳並以明經聞曾孫天寅初
名大丙字火傳號亮庵中順治甲午副榜著有靜鏡
齋集構家祠於塘栖長橋之西有傳經堂奉祖考之
遺書教授子弟旁爲月波樓芳杜洲亦藏書數萬卷
徧徵名宿題詠湖州吳園莢綺撰記最爲詳明茗書
之東百里環山而秀迴水而清桑麻平野闔閭輻輳
曰塘棲固杭湖兩郡接壤而南北之孔道也塘西之
西有廣濟橋里名長橋水陸絡繹橋之西遼廊平曠
蕩若無外有樓觀亭榭縈帶騫騰者卓氏祠宇在焉

其堂曰傳經爲火傳氏天寅祀其曾祖父入齋蓮旬
蕊淵三先生處後乃瀦泉爲池插竹爲籬松柏花石
旋拱其際堂之傍更爲三楹曰只是讀書池之中有
亭曰水心雲影循池而南方闌爲廊如帶曰且喫茶
昔董宗伯公思白所題也廊之前有亭曰泠泠來風
更轉而陟數級以上曰相於閣蕊淵先生因閣有詩
火傳因而屬王吏部西樵題之南可眺皋亭黃鶴西
則武康封禺諸峰皆在目焉閣之下小構數椽樹以
桐陰曰無事此靜坐入齋先生舊額欲其燕居默處
端坐凝思遶廊數武界以短垣曰橋西草堂其上以

武木齋書金卷中
三
貯三世遺書下以俟子孫講讀其中余顧而樂之水
之流者若藍若鏡若練若縠山之峙者或伏或鶩或
盤或踞以致危檣勁櫓之往來漁歌牧笛之互答清
風欲生翠煙自留斯皆卓氏之偉觀與雖然卓氏三
世皆一代大儒入齋先生擢學探濂洛一經自怡蓮
旬先生發之名重天下負欽奇厯落之致蕊淵先生
人月以未遇早逝世謂才命並同長吉迄今鉅公名
賢無不知有三先生者今火傳名又大起二子允域
允基皆克繼家學斯地而有卓氏之祠山將益秀水
將益清矣火傳爲余言自垂髫喪厥考母孺人丁氏

苦節三十年以長以教俾子若孫底有成立顧先人
卽世時憲司允南浙紳士之請爲建文人祠未果成
康熙元年母週一甲子諸紳士復上母之行於三臺
三臺檄學使者旌之曰節孝未幾母見背今於斯堂
立三世主於上歲時烝嘗淒然風木之餘悲愴然音
容之如在不知涕之泫然也嗚呼聆火傳之言見火
傳之苦心可謂孝也昔長白之山以范文正公而重
濂溪之水以周元公而重今卓氏子孫式其祖訓益
懋厥德凡文正之相業元公之理學皆可自致四方
之士過其門牆必將太息曰此卓氏三世讀書處而

其家學復淵源如是蓋低徊不去贊美弗絕者豈第
如余之今日哉又歸安嚴我斯爲之詩曰吾友火傳
天下士少年磊落聲名起君方弱冠我成童結交共
指茗溪水別來荏苒二十年頭顱蕭瑟已如此予方
高臥長安廬有客扣門迎倒屣頽然拱揖相我前知
是君家丈夫子袖中攜來雙鯉魚復持一卷冰雪書
長跪開書讀且羨羨君世德高門閭君家侍郎垂遺
烈英謀毅魄真人傑厥後播遷家西吳相傳數世多
賢哲入齋蓮句名巨儒高風獨行人追趨蟾臺蕊淵
大文舒光芒萬丈照寰區偉哉卓氏三先生風流不

愧漢西京前有韋孟及元成箕裘累葉何崢嶸吾友
讀書懷先澤歲時俎豆羹牆接此堂巋然號傳經遺
書萬卷留講席我曾扁舟過塘西古垣松柏晝樓迷
皋亭山色環蒼翠霅溪之水清無際上有園林氣鬱
蔥流連太息追高蹤嗚呼人生不識名教樂六經往
往成糟粕浮名富貴安所爲傳經之名良可思看君
名山圖不朽令子才華亦無偶安得拂衣登此堂彈
琴坐嘯共徜徉高山流水永相望按允域字永瞻有
思齋詩鈔允基改名元基字次厚號履齋康熙戊午
副貢官衢州教授有江上草吾家吟卓氏爲樓水鉅

族若去病先生爾康善經學著述等身肖生先生禹
才辨穎悟崇理學有鬘雲軒稿方水先生回資性奇
穎嫻經畧有東皋集辛彝先生彝順治丁亥進士歷
官左庶子善吟詠有瀛洲草蔗村先生長齡善古文
有高莊閣集人才蔚起於一時特附記之以見詩書
之食報無窮也

江邦玉

江元祚字邦玉錢塘人隱居不仕築草堂於西溪之
橫山堂之上爲擁書樓廣儲圖史邦玉嘯傲其中讀
書自得崇禎十年夏五嘉定馬巽甫元調訪之爲作

橫山擁書樓記云自橫山草堂盤曲而上卽堂爲樓
眉題擁書果睹萬卷或傳前朝或頽內府髹榻再尋
棐几稱是左史右經殆將連屋發爲文章宜有此構
推窗遠眺眼界全碧千峰若圍隱見樹杪邦玉因言
吾年三十八卽高揖博士不願備弟子員將盡讀樓
中書以自樂其樂因略出先世所藏及生平所購多
余所未見古本又出一時四方名人高士往來贈答
詩篇及文章圖畫竟日不能盡後乃示余自所爲文
俱有超然自得之妙而長公茂士亦徐出所作楊梅
賦及古樂府直欲與古人爭勝負父子風期格度如

此非此山將安歸而此山千百年來未蒙高士眄矚
今乃得江氏父子讀書其中以發幽光而增勝事則
此山不世之遭逢尤不可以不賀

武林藏書錄卷中終



